

Na osnovu člana 2. Zakona o javnim preduzećima ("Službeni list R BiH" broj: 4/92) i člana, 21/92 i 13/94), člana 52. Statuta općine Ključ ("Službeni glasnik općine Ključ", broj: 4/00), te Odluke o podjeli JP "UKUS" Ključ i osnivanju novih samostalnih JKP "RAD" i JP "UKUS" u Ključu (Odluke Upravnog odbora JKP "Ukus" broj: 357/01 od 21.09.2001. godine i 481/1 od 24.12.2001. godine), "Općinsko vijeće općine Ključ na svojoj XIX sjednici održanoj dana 02.03.2002. godine donosi:

ODLUKU

o osnivanju Javnog komunalnog preduzeća "RAD" Ključ.

I OPĆE ODREDBE

Član 1.

Ovom Odlukom o osnivanja Javnog komunalnog preduzeća "RAD" Ključ, utvrđuje se:

- firma i sjedište preduzeća
- djelatnost preduzeća
- sredstva za osnivanje i početak rada i način finansiranja
- prava osnivača u pogledu obavljanja djelatnosti
- međusobna prava i obaveze osnivača i javnog preduzeća
- organi upravljanja u preduzeću
- način formiranja cijena usluga
- raspodjela dobiti i saniranje gubitaka
- odredbe o radnim odnosima
- trajanje i prestanak preduzeća

Član 2.

Dosadašnje Javno preduzeće "Ukus" Ključ formirano Odlukom Prijelaznog Općinskog vijeća općine Ključ broj: 05-023-47/97 od 04.06.1997. god. Na osnovu Odluka Upravnog odbora broj: 357/01 od 21.09.2001. god. i 481/01 od 24.12.2001. god. i saglasnosti Općinskog vijeća općine Ključ br. 05-02-144/01 od 08.10.2001. i 05-02-188/01 od 29.12.2001. god. Dijeli se na dva nova pravna subjekta, tako da se Organizaciona jedinica "Vodovod i kanalizacija" izdvaja u samostalno novo Javno preduzeće "UKUS" Ključ, a preostali dio preduzeća se organizira kao novo samostalno Javno komunalno preduzeće "RAD" Ključ.

Član 3.

Osnivač Javnog komunalnog preduzeća "RAD" Ključ je Općinsko vijeće općine Ključ. Općinski društveni fond za stambeno komunalnu djelatnost i infrastrukturu Ključ zastupa Osnivača u smislu odredaba ove Odluke.

Član 4.

Danom upisa u sudski registar Javno komunalno preduzeće "RAD" Ključ stiče svojstvo pravnog lica.

Član 5.

U pravni promet sa trećim licima Javno komunalno preduzeće "RAD" Ključ stupa u svoje ime i za svoj račun, a za obaveze u pravnom prometu odgovara bez ograničenja (potpuna odgovornost), svim sredstvima sa kojima raspolaže, osim prirodnim bogatstvima općim dobrima koja su mu dana na korištenje.

Osnivač za obaveze u pravnom prometu Javnog komunalnog preduzeća "Ukus" Ključ odgovara do visine osnivačkog uloga utvrđenog u ovoj Odluci.

II FIRMA I SJEDIŠTE PREDUZEĆA

Član 6.

Naziv preduzeća je: Javno komunalno preduzeće "RAD" p.o. Ključ (u daljem tekstu: Preduzeće).

Skraćeni naziv Preduzeća je: JKP "RAD" p.o. Ključ
Sjedište Preduzeća je u Ključu, ulica Branilaca BiH bb.

Član 7.

O promjeni firme i sjedišta preduzeća odlučuje Upravni odbor uz saglasnost Osnivača.

Član 8.

Preduzeće ima pečat koji je okruglog oblika uobičajne veličine i u krug ispisano velikim štampanim slovima: JAVNO KOMUNALNO PREDUZEĆE "RAD" p.o. a vodoravno KLJUČ.

Štambilj Preduzeća je pravougaonog oblika na kojem je ispisano u dva reda: JAVNO KOMUNALNO PREDUZEĆE "RAD" p.o. KLJUČ, a ispod broj i datum.

III DJELATNOST PREDUZEĆA

Član 9.

Djelatnost Preduzeća je:

90.00. uklanjanje otpadnih voda, odvoz smeća i slične djelatnosti

- sakupljanje smeća
- odvoz smeća
- deponovanje smeća
- čišćenje i pranje ulica, puteva, parkirališta
- čišćenje javnih površina
- održavanje lokalnih puteva
- održavanje i uređenje javnih saobraćajnih površina
- 93.40 pogrebna djelatnost, održavanje i uređenje groblja
- 74.70 dimnjačarska djelatnost
- 45.1 pripremni radovi na gradilištu
- 45.1145.110 rušenje građevinskih objekata i zemljani radovi
- 45.212 niskogradnja
- 45.213 održavanje objekata visokogradnje, niskogradnje i njihovih dijelova
- 45.2345.230 izgradnja autoputeva i dr. saobraćajnica, aerodromskih pista i sportskih terena
- 45.24 izgradnja hidrograđevinskih objekata
- 45.4 završni građevinski radovi
- 45.5 davanje u najam mašina i opreme za gradnju
- 60.24 prevoz robe u drumskom saobraćaju
- 72.50 opravka i održavanje proizvoda precizne mehanike
- 50.20 održavanje i popravak motornih vozila za vlastite potrebe
- 93.05 opravka kućanskih aparata
- 93.01 pružanja usluga pranja, hemijskog čišćenja i bojenja tkanina i odjevnih predmeta
- 14.21 eksploatacija šljunka i pjeska
- 14.11 vađenje kamena
- 01.12 uzgoj cvijeća i ukrasnog bilja
- vanjska trgovina u okviru upisane djelatnosti

Član 10.

Preduzeće može bez upisa u sudski registar obavljati druge djelatnosti u manjem obimu koje služe obavljanju djelatnosti iz člana 9. ove Odluke, a koje se uobičajno vrše uz te djelatnosti u manjem obimu ili povremeno, a doprinose potpunijem iskorišćavanju kapaciteta, a ne predstavljaju obavljanje tih poslova kao redovne djelatnosti.

IV SREDSTVA ZA OSNIVANJE I POČETAK RADA I NAČIN FINANSIRANJA

Član 11.

Sredstva Preduzeća čine stvari, prava i novac.

Osnivač dodjeljuje Preduzeću sredstva za početak rada u iznosu od _____ a prema diobenom bilansu podjele dosadašnjeg

JP "UKUS" Ključ na dan 31.12.2001. godine i koji je sastavni dio ove Odluke.

Član 12.

Finansiranje djelatnosti iz člana 9. ove Odluke vršit će se iz sredstava koje Preduzeće ostvari pružanjem usluga građanima, fizičkim i pravnim licima i sredstava koja će namjenski izdvojiti Osnivač. Visina sredstava koju osigurava Osnivač utvrđuje se za svaku poslovnu godinu u budžetu općine Ključ na bazi srednjoročnog i godišnjeg programa poslovanja i razvoja Preduzeća.

V PRAVA OSNIVAČA U POGLEDU OBAVLJANJA DJELATNOSTI

Član 13.

Osnivač ima pravo kontrole racionalnosti poslovanja Preduzeća i kontrole namjenskog trošenja sredstava. Osnivač ostvaruje kontrolu nad Preduzećem razmatranjem godišnjeg Izvještaja o poslovanju Preduzeća, a po potrebi i u kraćem roku.

Član 14.

Ako Osnivač utvrdi da je u Preduzeću došlo do poremećaja u poslovanju Preduzeća, preduzeće mjere za nesmetano funkcionisanje rada preduzeća promjenom unutrašnje organizacije Preduzeća.

VI MEĐUSOBNA PRAVA I OBAVEZE OSNIVAČA I PREDUZEĆA

Član 15.

Javno komunalno preduzeće "RAD" Ključ se obavezuje da će poslove iz svoje djelatnosti obavljati blagovremeno, kvalitetno i stručno i na način koji će zadovoljiti potrebe i interese građana te da neće bez saglasnosti Osnivača preuzeti obavljanje drugih poslova koji nisu u saglasnosti sa djelatnošću.

Preduzeće se obavezuje da će se sredstva rada koja mu je dodijelio Osnivač kao i novostečenu imovinu čuvati s pažnjom dobrog privrednika. Preduzeće se obavezuje da će najmanje godišnje a na zahtjev Osnivača i više puta podnositi informacije i izvještaje o svom radu. Preduzeće se obavezuje da će od Osnivača tražiti suglasnost na Statut.

VII ORGANI UPRAVLJANJA I RUKOVOĐENJA PREDUZEĆA

Član 16.

Organ upravljanja Preduzećem je Upravni odbor koji se sastoji od predsjednika i dva člana. Upravni odbor imenuje Osnivač s tim da se jedan član imenuje iz reda zaposlenih radnika.

Član 17.

Prava i obaveze Upravnog odbora utvrđene su Zakonom o javnim preduzećima i Statutom preduzeća.

Član 18.

Direktora Preduzeća imenuje Upravni odbor na osnovu javnog konkursa uz predhodno pribavljenu suglasnost Osnivača. Mandat direktora traje 4 godine. Do sprovođenja javnog konkursa za izbor direktora, funkciju direktora obavlja će vršilac dužnosti direktora Ahmet Egrlić.

Član 19.

Direktor Preduzeća, zastupa i predstavlja preduzeće, predlaže program rada i plan razvoja, preduzima mjere za njihovo sprovođenje, podnosi izvještaj o poslovanju i godišnji obračun, predlaže unutrašnju organizaciju, donosi odluke o zasnivanju radnog odnosa, zaključuje i potpisuje ugovore u vezi realizacije usvojenog Programa rada i odluka Upravnog odbora, obavlja i druge poslove utvrđene Zakonom, Statutom i drugim aktima.

VIII NAČIN FORMIRANJA CIJENA USLUGA

Član 20.

Cijene usluga Preduzeća utvrđuje Upravni odbor uz saglasnost Osnivača.

IX RASPODJELA DOBITI I SANIRANJE GUBITAKA

Član 21.

Osnivač preduzeća učestvuje u raspodjeli dobiti srazmjerno svom udjelu u ukupnom kapitalu Preduzeća na način utvrđen Statutom preduzeća.

Član 22.

Ukoliko preduzeće ostvari gubitak u svom poslovanju isti se pokriva iz imovine Preduzeća sredstvima Osnivača ili na drugi način u skladu sa Zakonom kako bi se obezbijedili uvjeti za nesmetan rad Preduzeća.

Član 23.

U slučaju poremećaja u poslovanju Osnivač može poduzeti mjere kojima će osigurati uvjete za nesmetano funkcionisanje rada preduzeća i to:

- promjenu unutrašnje organizacije Preduzeća
- ograničavanje prava u pogledu raspolaganja određenim sredstvima
- onemogućavanje nesavjesnog vršenja upravljačkih funkcija
- druge mjere utvrđene Zakonom i Statutom

X ODREDBE O RADNIM ODNOSIMA

Član 24.

Radnici zaposleni u Preduzeću ostvaruju svoja prava u upravljanju i odlučivanju u skladu sa Zakonom, Statutom, Kolektivnim ugovorom i općim aktima Preduzeća.

XI TRAJANJE I PRESTANAK PREDUZEĆA

Član 25.

Javno komunalno preduzeće "RAD" Ključ se osniva na neodređeno vrijeme.

Član 26.

Preduzeće prestaje sa radom:

- Odlukom Osnivača
- Ako se pravosnažnom odlukom suda utvrdi ništavost upisa
- Radi sprovođenja postupka stečaja
- Na drugi način propisan Zakonom.

Član 27.

Ako Osnivač utvrdi da više ne postoje ekonomski uvjeti za rad Preduzeća i ako Preduzeće po sanaciji gubitka u vršenju svoje

djelatnosti ponovo u kratkom roku ostvari gubitak u poslovanju, donijet će se Odluka o prestanku rada Preduzeća.

Član 28.

Statut Preduzeća donijet će se u roku od 30 dana od dana donošenja ove Odluke. Statut donosi Upravni odbor uz saglasnost Osnivača.

Član 29.

Danom stupanja na snagu ove Odluke prestaje važnost Odluke Prijelaznog općinskog vijeća općine Ključ o osnivanju Javnog preduzeća "Ukus" Ključ broj: 05-023-47/97 od 04.06.1997. godine. Temeljem ove Odluke navedeno preduzeće će biti brisano iz sudskog registra. Ova Odluka stupa na snagu danom donošenja, a objavit će se u "Službenom glasniku općine Ključ".

Broj: 05-02-43/02

Datum: 08.03.2002. godine

**PREDSJEDAVAJUĆI
OPĆINSKOG VIJEĆA
Mehmed Begić**